

Lautatio Bacchanalchor Aesch

2.04.2017

D' Geburtsstund vo däm gmischte Chor
lit zrugg scho 24 Joor
für d' Winzerchilbi z'Aesch bigott
sucht me e g' eignete Ort
nit Schulhus oder Mehrzweckhalle
en Ort wo villne Lüt duet g'falle.

Und Winzerchilbi das wär flott
ä bitz Kultur au biete sott
so züglet me grad churzer Hand
s' halb Stadttheater do uf s'Land
Wybauverrein und Männerchor
als Patronat dränge sich vor.

Im Mittelpunkt stoht klar der Wy
drum isch dr Bachus au derbi
und das Spektakel ganz banal
bechunnt der Name Bacchanal
dr g' eignet Ort isch au schnäll g' funde
mir sitze do grad d'runter unde.

S' von Blarer Schloss gross, schön und gwaltig
dient mäng Joor als Gmeindverwaltig
vill gschiedi Chöpf düen do studiere
rechne, schriebe, programmiere
ganz ernscht und seriös lauft das
und gwöhnlich isch do druf Verlass

doch, im 1993 im Summer
erwacht dä Ort wie us em Schlummer
wenn d'ine wotsch chunsch nit drummumme
denn laufsch zerscht um e Abau umme
was sell das ? vön die afo spinne
hei die den nit gnue Platz drininne?

So froge sich d'Lüt uf dr Stroos
und z' Aesch goht s' grosse Rätsle los
no im September chunnt derzue
dass s' fertig isch au mit dr Rueh
ä Krach, ä Lärm, s' wird als wie schlimmer
bleibt das ächt jetzt eso für immer?

Gottlob wird s' Rätsel ändlich glöst
es gitt vill Lütt die sind nervös
nur s'Wetter isch nit wies sett si
do nützt au nüt die bescht Regie
doch s' Volk loht sich vo däm nit störe
es wott jetz öpis g'seh und g'höre

me sitzt spannt vor dem Schloss und luegt
wie sich das Huus verwandle duet
was do druf folgt gross, hell und farbig
isch es Spektakel einzigartig
so folgt denn Stück für Stück
eimol macht au s' Balett no mit

s'wird gsunge, tanzt und musiziert
us Hollywood früsch importiert
chunnt au dr Doolittle an das Fäscht
und wird grad uf der Bühni gwäscht
mi munklet do bereits im stille
sgit ä Bacchanalchor wo söll wietersinge

vill Kostüm hets, äs isch ä Hit
me kennt die meischte Lüt fascht nit
ä Königin, as Gschpängscht blass und grünen
dr Robin Hood ganz keck und küehn
zwei Closchards und vill edli Dame
ä Rocker lot eim böses ane.

ich chönnt no lang und breit verzälle
doch das heit Dir ja gar nit welle
dir heits vermuetlich alle gseh
drum bruchts au kei Erklärig meh
zum Wesentliche sett ich cho
süscht si mir in zwoi Stund no do

e paar vo dene bunte Gselle
mit Singe nüm hän höre welle
bim Treffe in dr hintere Chlus
e gmischte Chor entstoht do drus
und dä, wär het das sällmol dänkt
au hüt no vill Kultur eus schänkt.

Si singe vill und singe gärn
bi Aläss mängmol noch und färn
in Chilche, Säal und Mehrzwäckhalle
au in Fabrigge duet's ne g'falle
im Steigrübli, im Brüel and cool
lets go to International School

in Porrentrui und in dr Nacht
wo s' ganz Dorf zur Kultur erwacht
bim Landrootspräsidentefescht
bim Tanz im Mai gän si nur s' Bescht
bim Drummeli als grosse Hit
mache si grad 3x singend mit.

Ihr Repertoire isch breit und aspruchsvoll
in dä Probe mängisch nümme so toll
vo Aescher Liedli " du bisch dr Wystock"
vom Haydn "die Motetten di Venerabili Sacramento"
oder, ich wollt ich wär ein Huhn
und das vierstimmig, mit grossem Rum

Tuet me mtiäme Partnerchör zämesinge
musses vom Anfang a gut klinge
ä Potpurri mol zwüchedure
nochher cha den kein me Schure
zwei Herzen im Dreivierteltakt
dört hets den dr Chor so richtig packt

drumm singe d' Mitglieder do gärn mit
wills immer Neus und vill Abwechslig git.

Mäng Anlass chönnt i do no bringe
Wo si tüen schaffe oder singe
und Joor für Joor goht so verbi
lang nümme alli si derbi
wo in dr Chlus vor ville Joore
die sängerischi Treu hän g'schwore

Doch eis isch klar und das isch s' Bescht
nechtscht Joor do stigt e grosses Fescht
mit 25 zig mues das si
und mir si alle gärn derbi
mir wünsche jetz scho ganz guets G'linge
und dass dr frisch und froh chönnt singe

au dä Kulturpriss sell euch sterke
dass dir no lang und guet chönnt wirke
es grosses Dankeschön isch derbi
für alls wo gsi isch und wird si
dr Bachus sell euch guet geleite
dr Gsang euch no vill Freud bereite

drum dörfi jetz im Bacchanalchor überreiche
dr Kulturpris vo 2016 von dr Eiwohner- und dr' Bürger- Gmeini

ä Fründ und ä Verehrer vo Euch

Peter Nebel
Bürgerrat Aesch